

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्यमंत्री उमर अब्दुल्ला होरें जम्मू कश्मीर च टिकाऊ ते उच्च कदरें आली सैलसफा नीति दा आह्वान कीता ऐ।
- मुख्य सचिव होरें AMRUT परियोजनाएं गी समें सिर पूरा करने लेई आखेआ ऐ।
- विदेश सचिव विक्रम मिसरी हुंदे कार्यकाल गी दऊं होर ब'रे लेई बधाई दित्ता गेआ ऐ।
- जम्मू च बरखा करी हवा दी खराब गुणवत्ता थमां राहत थोई ऐ। बर्फबारी करी मुगल रोड बंद होई गेआ ऐ।

<><><><><><>

Tourism

मुख्यमंत्री उमर अब्दुल्ला होरें सैलसफा गी जम्मू कश्मीर दी अर्थबवस्था दी रीढ़ दी हड्डी मन्नदे होई टिकाऊ सैलसफा नीति दा आह्वान कीता ऐ जेहड़ी केन्द्र शासत प्रदेश दे सैलसफा दे क्षेत्र च सैलानिएं पर केन्द्रित होए ते जेहदा मकसद नोजवानें लेई रोजगार दे मौके पैदा करना होवै। आकाशवाणी दे जम्मू आले संवाददाता नै खबर दित्ती ऐ जे मुख्यमंत्री होरें कल सिविल सचिवालय जम्मू च इक उच्च स्तरै दी बैठक दी प्रधानता कीती ते सैलसफा आले मैहकमे दे कम्मकाज दा जायजा लैता। सैलसफा सरबन्धी मैहकमे दे कमीशनर होरें मैहकमे दी उपलब्धिएं, बढ़ावा देने आली गतिविधिएं ते भविष्य दी योजनाएं बारे जानकारी दित्ती। इस दरान कश्मीर मैराळान, जी-20 शिखर सम्मेलन, एफ-4 कार शो जनेह हाल च कश्मीर च होए दे कामयाब कार्यक्रमें दा बी जिक्र कीता गेआ। जम्मू च सनबर्न म्यूजिक प्रोग्राम ते जेके ट्यूरिसम डवैलपमेंट कन्कलेव 2024 बारे बी जानकारी दित्ती गेई।

<><><><><><>

Rather

जम्मू कश्मीर असेंबली दे स्पीकर अब्दुल रहीम राथर होरें आखेआ ऐ जे खास दर्जे दी ब्हाली बारे असेंबली च पास कीते गेदे प्रस्ताह गी मुत्तलका प्रशासन गी भेजी दितता गेदा ऐ। जम्मू कश्मीर दी असेंबली च हाल च विशेष दर्जे दी ब्हाली ते संविधानिक गरंटी बारे गल्लबात करने दी मंशा गी लेइयै इक प्रस्ताह पास कीता गेआ हा ते एह्दे लेई संविधानिक सरिस्ते च कम्म करने दी अपील कीती गई ही। एह् प्रस्ताह ध्वनिमत कन्नै पास कीता गेआ हा। बीजेपी गी छोड़ियै बाकी सब्बने पार्टिएं एह्दा समर्थन कीता हा। राथर होरें संगारै श्रीनगर च समाचार माध्यमें गी दस्सेआ जे जिस दिन असेंबली च प्रस्ताह पास कीता गेआ उससै दिन असें प्रस्ताह गी मुत्तलका प्रशासन गी सौंपी दित्ता हा।

<><><><><><>

NIA Searches

राष्ट्रीय पड़ताली अजेंसी एनआईए नै कल जम्मू कश्मीर समेत 6एं राज्यें ते केन्द्र शासत प्रदेशें च फैली दिएं 9एं बक्ख-बक्ख थाहरें पर तलाशियां लैतियां न। एह् कारवाई आतंकवादी गुप अलकायदा आस्सेआ आतंकी गतिविधिएं ते नोजवानें गी कहर बनाइयै भारत गी अस्थिर करने दी साजश रचने दे सरबंधे च कीती गई ऐ। एनआईए दे मताबक आतंकवादी संगठन अलकायदा गी गतिविधिएं लेई पैहा उपलब्ध कराने ते उसी समर्थन देने आले मुश्तवा लोकें खलाफ कारवाई कीती गई ऐ। जम्मू च नगरोंटा कोल बजालता ग्रां च छापा मारेआ गेआ ते किश दस्तावेज ते किश होर महत्वै आली सामग्री जब्त कीती गई। कर्नाटक, पच्छिम बंगाल, बिहार, त्रिपुरा ते असम च बी छापेमार कारवाई कीती गई।

<><><><><><>

Chief Secretary

मुख्य सचिव अटल डुल्लू होरें अमृत तैह्त केन्द्र शासत प्रदेश सतह दी मते इख्तेयारें आली कमेटी दी 5मीं बैठक दी अध्यक्षता कीती। उनें चला'रदे प्रोजेक्टें ते नमीं परियोजनाएं दी मंजूरी पर ध्यान देने लेई गलाया। मुख्य सचिव होरें अफसरें पर इस गल्ला लेई जोर पाया जे ओह् मंजूर कीती गेदी परियोजनाएं गी तौले शुरू करन तां जे इनेंगी समें सिर सबूरा कीता जाई सकै। उनें आखेआ जे नेइएं केन्द्र प्रायोजित स्कीमें दी बड़ी मती महत्वा हुंदी ऐ ते इंदी जमीनी सतह पर बेहतर ते कारगर ढंगै सिर अमलावरी होनी लोड़चदी।

अमृत-2 दी डब्ल्यूएसएस तैहत्त जम्मू खित्ते दे जिनें प्रमुख कस्बे दी ताल कीती गई ऐ, उंदे च जम्मू, भद्रवाह, बओत, आर.एस.पुरा, अखनूर, चनैनी, हीरानगर, कठुआ, लखनपुर, विजयपुर, रियासी शामिल न। मुख्य सचिव होरें नेह् कस्बे दी जरूरते गी जांचने लेई गलाया तां जे उंदे सरबंधी कम्मकाज गी पैहल दी बिनाह पर हल कीता जाई सकै।

<><><><><><>

Udhampur MLA

उधमपुर पच्छिम थमां विधायक पवन गुप्ता ते उधमपुर पूर्व थमां विधायक आर.एस.पठानिया होरें सरकारी महिला कालेज थमां बट्टल बालियां आले उद्योगी इलाके तैहत्त शिड़क पर लुक्क पाने आले कम्मै गी शुरू करोआया। उधमपुर थमां आकाशवाणी संवाददाता अचिन दूबे होरें विधायक पवन गुप्ता हुंदे हवालै नै जानकारी दित्ती जे अस शिड़क दे होर बेहतर बनने मगरा लोकें दिएं समस्याएं दा हल होग ते लोकें दी लम्मे चिरे थमां चलदी आवा'रदी मंग पूरी होई जाग। विधायक आर.एस.पठानिया होरें आखेआ जे उधमपुर च विकास गतिविधिएं गी इस चाल्ली कन्नै चलाया जाग जे एह आदर्श विधानसभा हल्का बने। आकाशवाणी कन्नै गल्ल करदे होई विधायक पवन गुप्ता ते विधायक आर.एस.पठानिया होरें आखेआ.....

<><><><><><>

Katra

रियासी दे अतिरिक्त जिला मैजीस्ट्रेट होरें भारतीय नागरिक सुरक्षा संहिता दी दफा 163 तैहत्त इख्तेयारें दा इस्तेमाल करदे होई सब डिबीजन कटरा च तम्बाकू उत्पादें जियां गुटखा ते गिर नेह् सरबंधी चीजें दी बिक्री ते खाने पर पूरी चाल्ली पाबंदी लाई दित्ती ऐ। एह पाबंदी मूरी चक्क नाके थमां पैथल नाके तगर ते ताराकोट रस्ते थमां माता वैष्णो देवी दे भवन तगर जाई गई ऐ। इस हुक्म दी खलाफवर्जी करने आले खलाफ सख्त कारवाई कीती जाग। रियासी दे अतिरिक्त जिला मैजीस्ट्रेट होरें मशीनी आरी दी बिक्री ते खरीद पर जिले च पाबंदी लाई दित्ती ऐ।

<><><><><><>

Foreign Secretary

मजूदा विदेश सचिव विक्रम मिसरी हुंदी सेवा गी दऊं ब'रें होर अगड़ा बधाई दित्ता गेआ ऐ। उंदा कार्यकाल 30 नवम्बर 2024 गी पूरा होआ करदा हा।

अगले सार्वजनिक शकैतें, पेंशन ते सिखलाई सरबंधी मंत्रालय दी नियुक्ति मुत्तलक कमेटी दे सचिवालय आस्सेआ विक्रम मिसरी हुंदे कार्यकाल गी बधाने दी मंजूरी दित्ती गई ऐ। 14 जुलाई 2026 तोड़ी जा अगले आदेश तोड़ी ओह् अपनी सेवा जारी रखगंन। 1989 बैच दे भारतीय विदेश सेवा दे अधिकारी विक्रम मिसरी होरें 15 जुलाई 2024 गी विदेश सचिव दे तौर पर अपना कम्मकाज संभालेआ हा।

<><><><><><>

J&K Tribal

जनजातीय मामले दे मंत्री जावेद राणा होरें जनजातीय समुदाय दे कल्याण सरबंधी विकास परियोजनाएं लेई रखे गेदे पैसे गी ओह्दे लेई खर्च करने लेई गलाया जेह्दे लेई ओह् हैन। आकाशवाणी जम्मू संवाददाता दी रिपोर्ट मूजब राणा होरें जनजातीय मामले सरबंधी मैह्कमे आस्सेआ अपनाए गेदे तौर तरीके ते परियोजनाएं दी अमलावरी दा जायजा लैता। उलें जम्मू खित्ते दे प्रशासन गी आखेआ जे ओह् नागरोटा च ट्राइबल भवन ते जम्मू खित्ते च एकलव्य आदर्श रिहायशी स्कूले गी पूरा करने च आवा'रदी रुकावटें गी दी करन। मंत्री होरें बक्ख-बक्ख स्कीमें ते नीतिएं दी बेहतर अमलावरी पर जोर पाया तां जे जनजातीय समुदाय दा समाजिक आर्थिक सशक्तिकरण होई सकै। उनें जनजातीय मामले दे सचिव होरें गी आखेआ जे ओह् जनजातीय समुदाय गी उंदे लेई बनाई गेदी स्कीमें बारे जानकार बनान तां जे एह् लोक अगगे आइयै एह्दे थमां लाह् लेई सकन।

<><><><><><>

Seed Village

कठुआ दे मुख् राई-बाई अधिकारी संजीव राय गुप्ता होरें कल मादा ग्रां च सीड विलेज प्रोग्रसम दा उद्घाटन कीता। एह्दे तैह्त् 100 हैक्टर दे इलाके गी आन्नेआ गेआ ऐ। उत्थे कनक नदी किस्मे दे बीह् होंगन। कठुआ थमां आकाशवाणी संवाददाता दी रिपोर्ट मूजब सुपर सीडर दा इस्तेमाल प्रगतिशील करसानें आस्सेआ कीता जा'रदा ऐ। इस बारे बोलदे होई प्रगतिशील करसान विजय कुमार ते मुख् राई-बाई अफसर संजीव राय होरें आखेआ.....

<><><><><><>

JK Snowfall

जम्मू ते एह्दे आले दुआले दे इलाकें च रातीं होई दी बरखा ते ऐनगड़ा पौने करी तापमान च गिरावट आई ऐ। एह्दे कन्नै हवा दी गुणवत्ता च बी सुधार होआ ऐ।

पिछले किश दिनें थमां एह खराब बनी दी ही। जम्मू ते कश्मीर दिएं उच्चिएं धारें पर हल्की थमां दरमेयाने दर्जे दी बर्फबारी होइ ऐ। दक्खनी कश्मीर गी राजौरी ते पुंछ जिले कन्नै जोड़ने आली मुगल रोड ते बांडीपोरा गुरेज शिड़क उच्चिएं धारें पर होई दी ताजा बर्फबारी करी गड़िडएं दी आओजाई लेई आरजी तौर पर बंद करी दित्ती गई ऐ। यातायात मैहकमे दे अधिकारी नै आकाशवाणी गी दस्सेआ जे सोनामर्ग ते कर्गिल राष्ट्रीय जरनैली शिड़क बी ताजा बर्फबारी करी बंद करी दित्तर गई ऐ। जम्मू श्रीनगर राष्ट्रीय जरनैली शिड़क दौनें भेठा दा गड़िडएं दी आओजाई लेई खुल्ली दी ऐ। मौसम विभाग नै अगले त्रऊं दिनें तगर मौसम दे खुश्क बने रौहने दी पेशगोई कीती ऐ। मौसम विभाग आस्सेआ दिज्जी गेदी जानकारी मूजब जम्मू खित्ते च कल दिने दा बद्धोबद्ध तापमान 26.4 डिग्री ते घट्टोघट्ट तापमान 14.5 डिग्री सैल्सियस दर्ज कीता गेआ। जम्मू खित्ते च कल 8.1 मिलीमीटर बरखा बी दर्ज कीती गई।

<><><><><><>